



Comunu de Scalepranu

Provìntzia de Casteddu

Ufìtziu de su Sìndigu

Bia Sìndigu Giovanni Carta n. 18 - 08043 Tel 07095410400 – fax 070 9541036

Cell 3204339103 - e-mail: sindaco@comune.escalaplano.ca.it

FESTA CUN IS DISTERRAUS – 13 AUSTU 2013

A totu is paesanus.

Cust'annu sa dia de sa Festa cun is disterraus torrat paris cun un'atra dia de importu, su 13 de austu, difatis, po su Predi nostu Don Luigi Mùrgia, ant a èssiri passaus bintixincu annus de s' ordinatzioni sua a predi.

At a èssiri una dia de importu po una figura manna po dònna comunidadi, e po arrispetu, sumpepari nosu scalebranesus, non podeus de seguru ammostai pagu interessu. Antzis, depit èssiri s'ocasioni po affortiai e, chi serbit, po torrai a agatai su sentidu de comunidadi, chi est sa nosta e si fait arriconosci, atobiendusì in un'ocasioni de festa non sceti po Don Luigi, ma po totu sa bidda nosta

Benendu a pari cun sa dia dedicata a is disterraus nostus at a èssiri sa mellus ocasioni chi at a permitiri fintzas a custus paesanus de pigai parti, cun totu sa comunidadi parrochiali, a custus ancodeddus de preghiera e de festa.

Su 13 de austu, a merici, seus atobiai in sa crésia parrochiali de "Santu Serbestianu", innui s'at a fai sa missa in onori de su predi nostu Don Luigi Mùrgia, pròpiu po arregordai su de bintixinc'annus de s'ordinatzioni a predi. Don Luigi, chi chen'e duda conosceis totus, at passau bellus catòdixi annus de sa vida religiosa pròpiu in sa comunidadi nosta.

Una persona de grandu valori culturali, un'arralladori capassu e pretzisu, chi at acumpangiau sa comunidadi nosta in un'àndala de fidi sintzilla, fundada apitzus de is printzìpius de prus importu, chi tenit sa dotrina catòlica, cuncontrastendu chentza de pàusu is medas tentas de donai pagu valori a custus insenniametus, in nòmini de una "modernizatzioni" de sa vida de fidi, chi nosu Catòlicus, po s'imprus, iaus a bòlliri prus indùllias fàcias a is usàntzias de custu tempus.

Deu, ma fintzas cument'è rapresentanti de custa Comunidadi, pentzu chi depaus torrai gràtzias po custa preséntzia importanti, po custu Seis totus cumbidaus a pigai parti a sa missa chi s'at a fai in onori Suu su 13 de austu, a is 18,00 in sa Crésia Parrochiali de Santu Serbestianu màrtiri. Acabbada sa missa seus agatai in pratza de Crésia po sighiri a afestai in cumpangia de Don Luigi.

A denoti, cument'e sempri, seus a pòdiri atobiai in sa Piatzeta Francescangelo Sedda po assisti a sa rapresentatzioni teatrali in lingua sarda, retulada "*Contus de cabudu de cena*", scritta de unu scalebranesu, Raffaeli Arcangelu Mereu, emigrau in Frància po medas annus, ma foghesu de adotzioni. Sa cummèdia, ambientada totu in bidda nosta e leada de is contus de tziu Giuanni Mereu chi torrat a fai bivi acuntéssius, logus e personas de atrus tempus, in una màgini de vida de bidda, chi santzinat tra realidadi, fantasia e faulaberus, interpretada beni meda de is atoris de sa Cumpangia teatrali "Sa Brulla" de Foghesu, chi arregordu sempri cun prexu, cun amigàntzia e grandu stimma.

Po totu su mesi de austu s'at a pòdiri abbisitai s'ammosta de sa provìntzia de Casteddu "Il Popolo del Bronzo" cuncordada po s'ocasioni in Scalepranu in su locali innui furiat sa scola média. In s'amosta podeus biri torraus a fai segundu sa mannària originali armas, bestiris e ainas de is bronzitus nuraxesus.

Siguru de ai fatu cosa agradéssia e cun s'abetu de s'atobiai in bidda, Si mandu unu saludu mannu fintzas a nòmini de totu su Consillu Comunali.

Marcu Lampis - Sìndigu de Scalepranu